

## الحضرة



في حضرة الدراويش

سَقَّفَ على كَفِّكَ

(الله حيّ)

قولها كثير رَدَد

وسيب جناحك للهوا

زي البخور

لما بيطلع للسما

مع عقد نور

مادد لآخر الكون

نوره بيتودد

يمكن تكون مديون

آن الأوان سدّد

....

الدنيا شبه السور

آخره الفنا...

والموت قسمة ونصيب

كَبَّرَ وهَلَّلَ بالغنا

وافرح مع المجاذيب

سيب اللي ساكن في الضريح

خليك جريح.. طالب دوا

يمكن تطيب

كل اللي زاروا الأوليا

بركات يا آل البيت...

قاصدين منال الرضا

وانا أصلي واحد زيهم  
في حضرته اتوضيت  
وعلى النبي صليت

....

الحضرة.. مش جوا المقام  
الحضرة.. علم الصالحين  
طهر ضميرك م الأنا  
وادعي في سرّك للملك  
كل الملايكة تقول آمين  
لو مرة حدّ هاسألك  
ما تقولش إنت تبقى مين  
سيب المناصب ع العتب  
اوعى الكراسي تخسرك

ساعة ذهب

هاتفضي روحك...

من وجع حمل السنين

البس في توب سيدنا عمر

واركب فرس.. مالهوش جرس

ذاكر دروس المحسنين

هَلِّ كمان

كالمبتدأ من غير خبر

خَلِّي الخبر...

مرفوع في أرض الطيبين

دراويشها ناس عاقلين

غلبوا السنين...

ورموها ريشة ف صَفَّهم ...

خدهم حنين

(الله حي)

نقشوها صوت على كفهم

خلوها غنوة ف حي

كل الملايكة تزفهم

....

وصفوه المجاديب

طب مين بي جذب قلبهم

غير العليم بالغيب؟!!

البس تياب سيدنا بلال

خطى الجبال

رفض الرجوع...

للضلمة وجحور الضلال

خُليكَ جَرِيء...٤

البعد جوع.. يكسر ضلوع

إحمد كريم...

على يوم ما حَطَّكَ ع الطريق...

ما تخافش من نوم اللئيم

ما تخافش من رتش الكلام

الحضرة مش جَوّ الضريح

الحضرة لَمَّة ناس كرام

بالسَّبحة والتسبيح

بيوحدوا رب المقام

في بيان صريح

رافع شعار اسمه: (السلام)

...

(الله حي) .. ( الله حي)

هو اللي خلق النور

هو اللي خلق الضي

هو السبب في الهدى

هو السبب في الهدي

واسألني

لسآك واقف...

على نفس السلم

بتسلم...

وتعدّ سنين

بتخلّع ف اسنانك

تتألم

والسّم بيهرّه شيطاتك

وانت...

رافض تتحطّف توهة

بين وحل وطين

أو بين الناس التايهين

لسّاك...

بتشيدّف أوتار الدنيا

أحلامك ع الشجره شباب

وبتفرد عضلاتها الفانية

وتكسرّ أعتاب الباب

بين ساعة وثانية

وبتضيع.. وشايفها ربيع

ما تفوق.. واسألني

م الآخر راح تطلع فوق  
وتقدّم ١٠٠ كشف حساب  
صليت؟ زكيت؟  
كم مرة من الدنيا اتوضيت؟  
لو شعرك شاب  
اسألني...  
وانا باكتب عن حالي جواب  
أنا ليه لميت م الدنيا سنيني  
ورايح على آخر ربع؟!  
والعمر الفاني بيذاكر  
وبيحفظ في سؤال القبر...  
أنا واحد خوّاف ...  
من خطوة بتمشي الأعراف

مش قادرة تدبّ...

مين قال ان انا واحد سبع؟!!

أنا واحد أغلب من قشّ

الغلب دا ببيان على رسمي

وتجاعيد الوشّ

والقوة اللي بتنزل...

من عاشر دور

بتفور...

والآخر بتروّح وتكشّ

ماعادتش الدنيا والله تهّمّ

وأخرها...

بيتجمد في العرق الدم

الساعة بتتوه في عقارب

وسهام الهم...  
بتفتح في سنين ع الغارب  
والآخر يتني الظهر  
ويتزيّن بالشعر الشايب  
وبيان القهر...  
اللي يعبي زكايب  
واهو ضاع العمر...  
بين سلب ونهب  
وباتصارع مع كل الخلق  
وفي الآخر محسوب الأمر  
ومحدود الرزق  
ماعادتش الدنيا تستاهل  
وانا واحد خوافة.. مش غافل

بيخاف من غضب الرب  
بيخاف من غيم الذنب  
بيخاف م المطرة...  
لتغرّق أيامه ف بكرة  
ويموت في الزحمة القلب  
ومش عارف ليه تاه الدرب؟!  
والموت طواف  
ومالوش مواعيد  
طول عمري باخاف الطوابير  
وباقصّي الليل بين دمع وتنهيد  
في فراغ بيصحي ضمير.. ويطير  
مش يمكن ساعة غفران  
وباكلمّ فيها التواب

أنا واحد جاي لك مسكين  
إنسان مذلول واقف ع الباب  
كان عايش دنيا المجانين  
مش عاصي.. لكن طمعان...

في الرحمة

يارب انا واحد...

مخنوق في الرحمة

ومش عارف اعيشها بوشين

ولا قادر أتلّون بلونين